

Pferde-Äbbel

Beinoh herre sich verhaache
mol zwaa Männer uff de Stroß,
un de Grund wor souzusaache,
weje 'm Haifche Mist ner bloß.

Des wor sou, dass aus em Stalle
kame Hengste vum Gestiet,
do ließ de aane ebbes falle,
was de Äbbel ähnlich sieht.

Kaum wor de Gaul voriwwer
un die Äbbel worn noch worm,
hot gemacht en Mann sich driwwer,
mit me Aamerche am Orm.

Doch do kimmt aus soim klaa Haisje
noch en annern Mann un schrie:
»Ei, ich glaab, du host's am Straißje,
legg des Zeig nur wirrer hiel!«

Weirer schreit er mit Gezeter:
»Was gejht dich dann ou der Mist?
Mach dich dinn, du Aff, du bleeder,
Queckegärtner, der de bist!«

Do kreischt voller Wut de Erste:
»Glei kriggst es Kletzje du verbumpt!
Un wann de Rand net hältst, do werste
mit de Nas enoigestumpt!«

Un wie se sich sou stritte,
wem des Heifche Mist geheert,
kimmt ganz oubemerkt en Dritte
un hot alles weggekehrt.

Un sou stande schließlich beide
dumm mit leere Hände do.
Sou geht's oft: wann zwaa sich streite,
lacht de Dritte – un is froh.



De Lehrling

»Schorsch«, sprach neulich de Herr Kremer
zu soim Lehrbub, »bass mol uff,
un es wär mer ougenehmer,
wann du do däst achte druff.

Also horch, du dust jo wisse,
un du lernst aach net umsunst,
dass mer oft veel babble misse,
dann es Verkaafe is e Kunst.

Do musst du vor alle Dinge,
wann aans in de Lare kimmt,
dem ganz leise bei dann bringe,
dass er aach was Deires nimmt.«

Un mit stolz geschwelltem Herze
dut de Schorsch sich voller Mut
uf die nächste Kundin stärke,
die eroi grad kumme dut.

»Ei Gun' Dach, was dun Se wolle?«,
frägt er, un erfährt aach glei,
dass die Fraa e Zeig will holle,
wou mer Wäsch dut waasche oi.

»Bitte, bitte, mit Vergnieje!«
– jetzt iss er im Temperament –,
Päckcher dun ner rum sou flieje,
während er die Preise nennt.

Un schun iss er wirrer bei 'rer,
leggt was annerst vor die Fraa:
»Des is zwor e bissje deirer,
äwwer vorteilhafter aa.

Um ihr Wäsch gut oizuwaasche,
nemme se des Mittel do.
Des is vorteilhafter, Fraasche,
weil mer mejh verdiene droo!«



Mehr zum Autor auf der Autorensseite